

Visoki predstavnik pozdravlja napredak u imenovanju sudija Ustavnog suda Federacije BiH

Visoki predstavnik danas je pozdravio važan korak koji su poduzeli predsjednik i dvojica potpredsjednika Federacije BiH, dajući prijedloge za imenovanje sudija na upražnjene pozicije u Ustavnom sudu Federacije BiH.

“Prijedlozi za imenovanje u Sud trebali su davno biti predati”, rekao je visoki predstavnik. “Ipak, predsjednik i potpredsjednici jasno su pokazali spremnost da interese građana stave na prvo mjesto. Ovo je važan korak u pravcu osiguranja punog funkcioniranja Ustavnog suda Federacije BiH, što je građanima Federacije već jako dugo bilo uskraćeno”.

Naredni korak će biti da Dom naroda Federacije BiH razmotri ove prijedloge za konačno imenovanje. „Međunarodna zajednica će s velikom pažnjom pratiti rad Doma naroda i očekuje napredak. Bilo je previše političkih igara koje su nepotrebno odlagale ova imenovanja i ugrožavale funkcionalnost najvišeg suda u Federaciji”, kazao je Inzko.

Ustavni sud FBiH već je nekoliko godina bez punog sastava sudija i bez funkcionalnog Vijeća za zaštitu vitalnog nacionalnog interesa.

Iako funkcionalan sud i Vijeće za zaštitu vitalnog nacionalnog interesa mogu izgledati kao nešto što je veoma daleko od svakodnevnih briga građana Federacije, to je daleko od istine. Nepostojanje funkcionalnog Vijeća za zaštitu vitalnog nacionalnog interesa praktično znači da samo nekoliko delegata u kantonalnim i federalnoj skupštini imaju mogućnost da efikasno blokiraju sve odluke, uključujući i donošenje budžeta. To se direktno odrazilo na nefunkcionalnost nekolicine kantona i Federacije u proteklih nekoliko mjeseci.

“Budući da se opći izbori približavaju, od apsolutno suštinske je važnosti da se ovaj problem riješi, kako se formiranje vlasti nakon izbora ne bi nepotrebno blokiralo a glasovi građana bili protraćeni. Mogu samo pretpostaviti da nijedna stranka neće odlučiti da glasa tako da građanima Federacije uskrati osnovna prava na funkcionalan pravosudni sistem. Ukoliko se to ipak desi, onda će morati da preuzmu punu odgovornost za takvo ponašanje. Pozivam političke stranke i delegate da pokažu da su dio rješenja. Znam da će i međunarodna zajednica i šira javnost to pomno pratiti,” dodao je visoki predstavnik.

Nakon što Dom naroda potvrdi jednog ili oba predložena kandidata, visoki predstavnik očekuje od nadležnih vlasti da brzo poduzmu preostale korake kako bi sudije u najkraćem mogućem roku stupile na dužnost. Također, očekuje od Parlamenta Federacije da što prije popuni i preostalo upražnjeno mjesto sudije u Vijeću za vitalni nacionalni interes i osigura da Vijeće u potpunosti funkcioniра i da može odlučivati o predmetima koji se pred njim nalaze.